



Anwar bersama Presiden dan Ketua Pegawai Eksekutif Kumpulan PETRONAS, Tan Sri Tengku Muhammad Taufik (kanan) dan Naib Pengerusi S&P Global, Daniel Yergin melancarkan Persidangan Energy Asia 2023 di Pusat Konvensyen Kuala Lumpur, semalam. (Foto Aizuddin saad/BH)

Pelabur, pembiaya dipelawa terokai Asia

Rantau dilimpahi sumber semula jadi, potensi tenaga diperbaharui

Oleh Zanariah Abd Mutalib dan Hazwan Faisal Mohamad
bhnews@bh.com.my

Kuala Lumpur: Datuk Seri Anwar Ibrahim mempelawa pelabur dan pembiaya untuk menerokai Asia, yang dilimpahi dengan sumber semula jadi, potensi tenaga boleh diperbaharui dan populasi yang tidak menolak inovasi serta menghargai ekonomi hijau.

Perdana Menteri berkata, rantau Asia berpotensi berkembang sebagai pemain dalam rantaian nilai sifar bersih sama seperti sumber biodiversiti yang kaya dan peratusan tinggi litupan hutan, menawarkan banyak penyelesaian berasaskan alam semula jadi.

“Selain membangunkan peluang hidrogen dan CCS (penangkapan dan penyimpanan karbon) untuk menyimpan karbon, dengan inovasi bateri dan penyimpanan elektrik berjalan dengan baik, terdapat peluang untuk memajukan mineral nadir bumi serta mewujudkan ekosistem kondusif bagi mengukuhkan rantaian bekalan.

“Pelabur dan pembiaya berisiko berhadapan kerugian jika tidak memanfaatkan perkara ini,” katanya dalam ucapan pada Persidangan Energy Asia 2023 di Pusat Konvensyen Kuala Lumpur (KLCC), di sini semalam.

Anwar berkata, membangun-

kan sumber dan potensi itu memerlukan akses kepada pembiayaan, teknologi dan inovasi, rangka kerja dasar yang tepat dan set kemahiran untuk masa depan.

Sementara itu, Perdana Menteri berkata, Pelan Hala Tuju Peralihan Tenaga Negara (NETR) serta Pelan Hala Tuju Teknologi dan Ekonomi Hidrogen (HETR) yang akan menggariskan strategi menyeluruh dan inisiatif berimpak tinggi bagi mempercepat usaha peralihan tenaga negara, disasar dilancarkan pada separuh kedua tahun ini.

Sasaran dalam RMK12

Beliau berkata, ia sebahagian usaha bagi mencapai sasaran Sumbangan Nasional yang Ditentukan (NDC), yang terkandung dalam Rancangan Malaysia Ke-12 (RMK12) dan Dasar Tenaga Negara 2021-2040 (NEP 2040).

Dokumen dasar itu secara strategik akan memeta arah ke hadapan dan menggariskan keutamaan bagi sektor tenaga pada masa akan datang serta meletakkan sektor itu sebagai pemangkin utama dalam pembangunan sosio ekonomi serta Aspirasi Negara Rendah Karbon 2040.

“Bagi melaksanakan dasar ini dengan jayanya, sehingga mencapai manfaat penuh daripada kemajuan sosioekonomi yang penting bagi negara, kerajaan sedang membangunkan beberapa pelan hala tuju strategik, dengan yang paling penting adalah NETR.

“Ia akan dilengkapi dengan HETR, yang akan membuka jalan kepada pencapaian kemampuan alam sekitar, keselamatan tenaga jangka panjang di Malaysia, yang dipacu inovasi teknologi,” katanya.

Perdana Menteri berkata, sebagai sebahagian daripada tanggungjawab setiap negara terhadap sasaran iklim global secara keseluruhan, Malaysia menyemak semula NDC bagi mengurangkan intensiti pelepasan gas rumah hijau kepada 45 peratus menjelang 2030, berbanding yang ditetapkan pada 2005.

Selain itu, katanya, Malaysia terus melihat gas asli memainkan peranan penting dalam campuran tenaga dan sebagai satu daripada hidrokarbon terbakar paling bersih untuk beralih ke arah ekonomi karbon rendah.

Pada masa sama, Anwar berkata, negara juga menyedari kepentingan menguruskan pelepasan metana sebagai gas rumah hijau yang sangat berkesan dan mengurangkan pelepasan gas itu sebanyak 30 peratus menjelang 2030.

“Industri kita yang berpengalaman juga menawarkan beberapa pendekatan semula jadi kepada yang boleh diperbaharui dan ekonomi karbon yang lebih rendah.

“Sebagai pengeluar tradisional gas asli dan gas asli cecair (LNG), hidrogen adalah langkah semula jadi seterusnya dalam rantaian nilai dan menawarkan laluan berpotensi untuk pertumbuhan ekonomi seterusnya,” katanya.

Bagi membangunkan keupayaan tenaga kerja tempatan, terutama belia, Perdana Menteri berkata, Malaysia melaksanakan pelbagai program, termasuk menyokong program latihan kemahiran teknikal dan vokasional (TVET) bagi melengkapkan modal insan dengan kemahiran yang diperlukan.

“Usaha dan inisiatif ini akan membuka lebih banyak potensi kepada ekonomi Malaysia, peluang kepada pertumbuhan untuk semua, sejajar dengan rangka kerja Malaysia Madani,” katanya.